

vnd dergleich selbst dorauß machen können, vnd die innleger vnd samptskewffer, die in irn herbergen vnd gewelben solche obenberurte pfennigwert vorkeuffen vnd vorhandeln mogen, doch sich nicht anders damit zuhalten dann nach laut des rats gesetzen vnd der tafeln in der wage hangende bey des rats pen vnd busse darinne begriffen. Derhalben sal auch keyne netterin offen laden halten vnd keyn ellenmoß von seyden, leynwant oder anderm, nach gewegne war hynder der innunge vorkewffen, awßmessen vnd hynwegen, sundern welche netterin den leuten vmb lon arbeiten, die mogen wol an eynem offen laden sitzen, den leuten vmb ir lon arbeiten vnd machen was in bracht wirt, vnd auch eyne hawbe, tzwu oder drey vnd des gleichen, was sie auf den kauf arbeyten, an iren laden oder fennster hengen ane der cramer insage vnd vorhindernis. Auch sollen hierynne die drey margkttage vor vnser lieben frawen tage lichtmesse außgeschlossen seyn, auf den nach alder gewonheit eynem iden frei seyn sal vnd bleiben wachs zuschlahen vnd entzeln awßzuwegen vnd zuuorkewffen. Vnd darumb wo die kramermeyster ymandes daruber, der die vorberurten pfennigwert in die innunge gehorende, auch anders dann die gesetz der tafel in der wag hangende besagen, er wer gast oder burger, der mit yn nicht innunge hette, betreten vnd in oder sie des vberkomen wurden, entzeln awßwegen oder bey ellenmaß vorkeuffen wurden, den oder die sollen vnd mogen sy nach alder gewonheit durch erleubnis des gericht vnd mit dem froneboten pfenden, sich alsdann mit dem pfant geyn gerichte wenden; der oder dieselbigen vbertreter sal itzlicher besunderen alsdann den cramern sulchs mit zweyen pfunt wachs vorbussen vnd solehs auch kegen dem gericht ader vnns dem rate nach des gericht oder vnsern erkenntnis abetragen; vnd darumb das der richter in den froneboten vorleyht mit den cramermeistern vmbtzu gehen vnd wu es not sein wirt zupfenden, so sollen sie derhalben alle iar ierlich vor fastnacht dem gericht zweyntzigk vnd dem fronen acht groschen der besten muntz reychen vnd geben. Sie sollen auch in vnd awßerhalb den merckten auf die partyrer vnd Schottenn eyn vleyssigk aufsehen haben, das die rechtfertige war an spetzerey oder andern vorhandelen vnd vorkawfen, vnd wo sie imandes betreten vnd ankommen wurden, der nicht rechtfertig vnd kaufmans gut feyl hette oder vorkeuffte, den sollen sie dem rate getreulich offenbarn. Darnach ist in zugelassen, wer do innunge mit in gewynnen wil, der ader die sal in yn ire lade drey gulden Reinisch vnd vier pfunt wachs zu yren kertzen geben, doch mogen sie demselben daruber guten willen ertzeigen darnach sy erkennen, das seyn notturft erfordert, vnd sulchs sal zu yrem geuallen stehen. Auch haben sie sich vndereynander vorwilligt, das hinfur nyemandes von irer innunge am margkttage als tzwir in der woche mer dann eyne bude auf den margkt setzen vnd feylhaben, auch das hinfur keyner alle tage vf dem margkte zu buden stehen sal, besundern das eyn itzlicher am margkttage nach dem andern, als der iungste nach dem eldisten, inmassen er in die innung kommen ist vnd darnach er pfennygwert feyl hat, ordentlich stehen sal, bey busse tzweyer pfunt wachs. Vnd ab auch imandes vnder in den kramermeistern sulcher busse halben honsprechen wurde oder sie mit scheltworten oder dergleichen vbirfarn vnd sich also vngehorsamlich wider sie ertzeigen oder setzen wurde, die sollen den gewerken